

四庫全書

史部

欽定四庫全書

史部
金石文字記卷三

詳校官編修臣潘廷筠

編修臣程嘉謨覆勘

總校官知縣臣繆琪

校對官主事臣陳文樞

謄錄監生臣張泰

欽定四庫全書

金石文字記卷三

崑山顧炎武撰

唐

芮公豆盧寬碑 正書 永徽元年

今在醴泉縣殘缺

大唐三藏聖教序并記 太宗撰序 高宗撰記 褚

遂良正書 永徽四年十二月

今在西安府城南慈恩寺塔下

趙嶠曰據張茂中遊城南記云寺經廢毀殆盡惟一塔儼然則今寺亦非唐剎而塔自宋熙寧火後不可登萬厯甲辰重加修飾施梯始得至其巔求記所謂唐人墨蹟孟郊舒元興之類皆不可得塔下四門以石為枕枕上唐畫佛像精絕為游人刻名侵蝕可恨東西兩龕褚遂良書聖教序記尚完好而唐人題名碑刻無一存者問之僧云塔前元有碑亭乙卯地震

塔頂墜壓為數段今亡矣

萬年宮銘 高宗御製并書 行草 永徽六年五月
今在麟遊縣

舊唐書高宗永徽二年九月戊戌改九成宮為萬年
宮乾封二年二月辛丑改萬年宮依舊名九成宮冊
府元龜永徽五年五月制萬年宮銘刻石于永光門
外仍令中書門下及文武三品已上并學士自書名
位于碑陰刻之

尚書張後盾碑 正書 顯慶三年三月

今在醴泉縣

衛公李靖碑 許敬宗撰 王知敬正書 顯慶三年

今在醴泉縣殘缺

其文有曰憫茲視冥冥即肉字謂蚩愚之人也史記
李斯傳禽鹿視肉索隱曰禽鹿猶禽獸也言禽獸但
知視肉而食之莊子及蘇子曰人而不學譬之視肉
而食文子言人有二十五等其二十四等謂之肉人

廣韻肉俗作宐越絕書陳音對越王斷竹續竹飛土
逐宐作此宐字乃俗書也而今人以為古字誤矣

王居士磚塔銘 上官靈芝撰 敬客正書 顯慶三
年十月

近出終南山榷梓谷土中

蘭陵長公主碑 正書 顯慶四年十月

今在醴泉縣首曰太宗文皇帝之第十九女也殘缺

岱岳觀造像記 正書 顯慶六年二月

泰山之東南麓王母池有唐岱嶽觀今存小殿三楹
土人稱為老君堂其前有碑二高八尺許上施石蓋
合而束之其字每面作四五層每層文一首或二首
皆唐時建醮造像之記周環讀之得顯慶六年一首
儀鳳三年一首天授二年一首萬歲通天二年一首
聖歷元年一首久視二年一首長安元年一首四年
二首神龜元年一首景龍二年一首三年一首景雲
二年三首開元八年一首大歷七年一首建中元年

一首其空處又有唐代人題名書法不一東側面有詩一首其下題名西側面題名亦有詩一首中二側面皆無字唐碑存於泰山者唯此及玄宗泰山銘蘇頌東封朝覲頌二文皆磨厓刻於山上而此碑在山下以小而雙束故不仆書非名筆故摹拓者少而獨完至今因歎唐時六帝一后修齋建醮凡二十許共此二碑亦異乎近代之每歲一碑以勞人而災石者矣但不知趙德甫金石錄何以不收恐古人碑記失

傳者正多耳碑下為積土所壅予來游數四最後募人發地二尺下而觀之乃得其全文云

許洛仁碑 正書 龍朔二年十一月

今在醴泉縣殘缺

大唐三藏聖教序并記 褚遂良正書 龍朔三年六月

今在同州

按舊唐書褚遂良傳永徽元年出為同州刺史三年

徵拜吏部尚書顯慶三年卒於愛州至龍朔三年則
遂良之亡已五年矣恐是後人追刻也

王弘撰曰碑後有大唐褚遂良書在同州倅廳十一
字當是後人補書其書法亦微不類

道因法師碑 李儼撰 歐陽通正書 龍朔三年十
月

今在西安府儒學

古人晤悟二字多通用此碑才晤聰晤即晤三空皆

是悟字而王右軍蘭亭序悟言一室之內又以晤為
悟陸雲逸民賦明發悟歌亦以晤為悟

騎都尉李文墓誌銘 正書 麟德元年二月

今在同州

會善寺造像記 八分書 麟德元年十月

今在本寺大殿前右

贈太師孔宣公碑 崔行功撰 孫師範八分書 乾

封元年

今在曲阜縣廟中

碑文內升升二字升音陞升音糾隸釋漢苦縣老子
銘有升星字司隸校尉楊孟文石門頌上順升極白

石神君碑米升五錢注竝云斗字

漢隸分韻升升
二字上升下斗

唐

比丘尼法琬碑天分斗極竟作升字則謬矣昔人以
其文易混故改升為斗俗作斗而二字多有誤者故
漢書食貨志治田勤謹則畝益三升不勤則損亦如
之臣瓚曰當言三斗尚書帝命驗黃曰神斗博雅誤

作神升又世語姜維膽大如升誤作斗

字之从斗者漢樊毅復華下民租田口算碑斛作斛
苦縣老子銘涼州刺史魏元平碑科作科魏受禪碑
料敵用兵料作料王知敬李衛公碑運奇料敵料作
料歐陽通道因法師碑斜作斜韋虛心鄭子春北嶽
廟碑史惟則慶唐觀金錄齋頌魁作魁晉書孝武帝
紀論謝玄之善料軍事何超音義曰料力弔反一作
料後人不知古人書法妄改為斷而淳化閣帖晉簡

文帝書斟字作𪔐又於升旁加一點以別升字後周
華嶽頌𪔐字亦同張公禮龍藏寺碑揖讓而升大寶
升字作斗以斗加一點為升則不經之甚矣

燕公子志寧碑 令狐德棻撰 子立政正書 乾封

元年十一月

今在三原縣

郭君碑 乾封二年

今在汾陽北七十里郭社村

朱彞尊曰碑文有云揮霜鉞而斬老生蓋從太宗攻霍邑者按唐書宋老生投塹為劉弘基所殺而溫大雅創業起居注則云老生攀繩上城軍頭盧君諤所部人跳躍及而斬之今讀此碑乃知揮刃者之為郭君而首二行剝裂其名字門世及撰文者皆闕其知為郭君者藉有碑額存爾

華陽觀王先生碑 于敬之撰 王玄宗正書

拓本其文但云乾封二年十一月九日卒不著立碑

之年按舊唐書高宗調露二年二月戊午賜故王清
觀道士王遠知謚曰昇真先生贈太中大夫此碑所
謂王先生名軌字洪範乃遠知之弟子也

淄川公李孝同碑 諸葛思禎正書 咸亨元年五月
今在三原縣

碧落碑 篆書 韓王元嘉四男為母房太妃立碑云
有唐五十三祀龍集敦牂則咸亨元年也

唐書言垂拱中元嘉徙絳

州刺史與此不合

今在絳州有咸通十一年鄭承規釋文但篆文難通者頗多而翻刻復多舛誤如淮館儀僊釋僊為山貪逮餘漏釋逮為建注儀鄰以同煥釋同為洞直書心事釋書為言敏心感慕釋敏為叨竝誤

敏古叩字出周禮宋謝靈運山居賦卷敏舡之逸曲感江南之哀歎用此字此碑用粵若稽古作乚託字作僣宋韓僣曹字本此

大唐三藏聖教序記并心經 僧懷仁集王右軍書

咸亨三年十二月

今在西安府儒學

王弘撰曰序中如金容掩色心經中色不異空空
中無色諸色字於草法合至空不異色色即是空空即
是色無色聲香味觸法諸色字乃色字集書者誤以
此作色字耳觀天地苞乎陰陽苞字下體文抱風雲
之潤抱字右邊自見而昔人無言及之者

金剛經 王知敬正書 咸亨三年 月

今在少林寺殿後字多剝落

鄭惠王石塔記 行書 咸亨四年

今在潞安府

亳州錄事參軍殘碑 八分書 咸亨四年

今在 參軍亡其姓但有父賢隋校書郎字又

曰夫人恒農楊氏恒農本弘農避太子弘名改之又

曰嫡子銀青光祿大夫直昭文館上柱國長樂下缺

西峰秦皇觀基浮圖銘 喬師望撰并書 八分書

上元二年七月

拓本

此當在華山西峰而今不得其處基字不諱而文有
云匈奴□獵關塞□清越裳奉贄風塵不驚知其為
前上元也師望時為華州刺史

薛公阿史那忠碑 正書 上元二年

今在醴泉縣

明徵君碑 高宗御撰 高正臣書 上元三年四月

今在上元縣棲霞寺唐有兩上元此云景子者高宗號也

舊唐書明崇儼傳累遷正諫大夫特令入閣供奉崇儼每因謁見輒假以神道頗陳時政得失帝深加允納潤州棲霞寺是其五代祖梁處士山賓故宅帝特為製碑文親書於石論者榮之今按此碑乃高正臣書史家以御製并訛為御書耳

上柱國任君碑 正書 上元三年十一月

今在汾州府南門外二里文侯村

任君名恭官至金紫光祿大夫上柱國臨濟縣開國男貞觀十七年二月卒夫人郭氏其文有曰未挂東都之冠先覆北墉之首按論語伯牛有疾注禮病者居北牖下仁山金氏曰牖字誤當作墉蓋室中北墉而南牖墉墉也

修孔子廟詔表 八分書 儀鳳二年七月

今在曲阜縣廟中武德九年詔一通乾封元年詔一

通皇太子請立碑表一通乾封元年祭文一通共一
碑金明昌三年開州刺史高德裔記重建歲月於末
英公李勣碑 高宗御製并書 行草 儀鳳二年十
月

今在醴泉縣

贊廣韻作贊胡畎切獸名似犬多力出西海倒一虎
者非也五經文字亦云贊于犬反從二虎從貝俗以
二虎顛倒與說文字林不同此書用俗體倒一虎而

又缺一筆以避太祖諱今人不識之矣蘇文舉開業
寺碑亦用此體爾雅贇有力注出西海大秦國有養
者似狗多力獷惡沈佺期驩州寄家人詩且懼威非
贇寧知心是狼杜甫哀蘇源明詩不要懸黃金胡為
投乳贇寄劉峽州詩乳贇號攀石飢飽訴落藤注引
炙轂子載贇銘曰爰有獷獸厥形似犬飢則馴服飽
則反眼出於西海名之曰贇

梁昇卿御史臺精舍碑作贇一武一虎更奇

文選左思魏都賦兼葭贅薈弱林李善注引說文曰
贅分別也此又一義

岱嶽觀造像記 儀鳳三年三月

開業寺碑 蘇文舉正書 開耀二年二月

今在元氏縣封龍山西吳村

碑陰多宋人題名有曰濟南李致至道王亢退之沿
檄過此同宿承天佛舍元祐辛未陽月念五日題以
廿為念始見於此楊用修謂廿字韻書皆音入惟市

井商賈音念而學士大夫亦從其誤者也

天后御製詩并書一通 王知敬正書 永淳二年九月

今在少林寺

中書令馬周碑 許敬宗撰 殷仲容八分書

今在醴泉縣殘缺

申公高士廉瑩兆記 許敬宗撰 趙模正書

今在醴泉縣殘缺

散騎常侍褚亮碑 八分書

今在醴泉縣殘缺 以上三碑皆高宗時立

王徵君臨終口授銘 弟紹宗甄錄并書 正書 垂

拱二年四月

今在嵩山老君洞南徵君即王玄宗也

美原神泉詩并序 篆書 垂拱四年四月

今在富平縣碑兩面其一面為雲陽主簿明臺子徐
彥伯字光序裕明子河東尹元凱字械左司郎中溫

翁念字敬祖天官員外郎李通字至遠各詩一首五
言十二句其額曰大唐裕明子書其一面為美原縣
尉□□旦字如序內三人皆以一字為字

澤王府主簿梁府君并夫人唐氏墓誌銘 四品孫義
陽朱賓撰 五品孫滎陽鄭莊正書 垂拱四年十一
月

近出終南山梗梓谷土中

岱岳觀造像記 天授二年二月 萬歲通天二年

聖歷元年臘月 久視二年正月 長安元年十二月
四年九月 十一月各一首

碑凡大周年者天作而地作堊人作至聖作璽臣作

憲年作彗月作⑤亦作⑥

韻會以⑥為生字誤考此碑及順陵碑⑥字並是月

字

日作②星作○正作⑦授作⑧

契苾明碑授作⑧

初作璽

唯履字無可考疑是應字凡數字作壹貳叁肆捌玖
等字皆武后所改及自制字其璽歷年記有云設金
錄寶齋河圖大醮泰②泰古七字太玄經玄攤曰運

諸叅政玄梘曰梘擬之二叅方言曰吳有叅娥之臺

晉東督玄居釋
夕宿七娥之房

王莽候鉦銘候鉦重五十叅斤是也

後人不知妄于左旁添鑿三點淺而大又稍偏知非

一筆

唐碑書七字亦有作漆者今墨子書周公旦朝
讀書百篇夕見漆十士張參五經文字七作漆

後人省筆作柒柒即漆之草書趙古則謂以七漆二
字合成造之非也山海經剛山多柒木水經注漆水
下有柒縣柒渠柒漢字皆
作柒今作柒又柒之省

舊唐書睿宗紀先天二年三月癸巳詔制敕表狀書

奏牋牒年月等數作一十二二十三十四十字是知前

此皆借壹貳等字矣不知其始於何年也

程大昌演繁露曰古書一為弌二為弌三為弌蓋以弌為母而一二三隨數附合以成其字特不知單書一畫為一單書二畫三畫為二為三起自何時今官府文書凡其記數皆取聲同而點畫多者改用之於是壹貳參肆之類本皆非數直是取同聲之字借以為用貴點畫多不可改換為姦爾本無義理若十之用拾八之用捌九之用玖尤為不倫

韻會捌破聲劉歆遂初賦石捌

破之
出

亦有似可相通者易之參天兩地左傳自參以

上則往稱地來稱會是嘗以參為三矣

考工記錡矢
參分弗矢參

分莊子參月而後能外天下史記滑稽
傳飲可八斗而醉二參竝以參為三

顏子不貳過

士有貳宗國不堪貳為其與正為副則貳之為二尚

或可以傳會矣在顏師古時江克傳固已訛大臺為

太壹又薛宣傳本曰壹笑為樂而俗本乃改壹笑為

壹矢是此時一已為壹矣若元本不用壹字則一字

本止一畫何緣轉易為壹也又今漢書凡一字皆以

壹代

詩壹醉日富壹者之來大學壹是皆以修身為本周禮典命其士壹命公羊襄二十九年傳許

夷狄者不壹而足

則一變為壹已在師古之前矣

冊府元龜謂叙傳班

壹當作一流俗本改壹為誤非也

然而古今經史凡書千百之字無

有用阡陌之阡伯叔之伯者予故疑舊本不曾改少畫以從多畫也然不能究其起自何時

洪氏容齋隨筆曰古書及漢人用字如一之與壹二之與貳三之與叁其義皆同鳴鳩序刺不壹也又云用心之不一也而正文其儀一分表記節以壹惠注

言聲譽雖有衆多者節以其行一大善者為謚耳漢
華山碑五載壹巡狩祠孔廟碑恢崇壹變祝睦碑非
禮壹不得犯而後碑云非禮之常一不得當則一與
壹通用也孟子市價不貳趙岐注云無二價者也本
文用大貳字注用小二字則二與貳通用也易繫辭
參天兩地釋文云參七南反又如字音三周禮設其
參注參謂卿三人則三與參通用也

冊府元龜文宗太和二年十月詔天后所撰十二字

竝却書其本字今按景龍以後碑志之文固皆書其
本字矣不知何以復有此詔

封祀壇碑 武三思撰 薛曜正書 天冊萬歲二年

今在登封縣西萬羊岡下截剝蝕亡其月日

珍州榮德縣丞梁師亮墓誌銘 正書 萬歲通天二

年三月

今在西安府百塔寺

師亮字永徽以本朝年號為字猶漢袁紹之字本初

質帝年
號本初
古人之無避忌如此

中嶽體玄先生潘尊師碣文 王適撰 司馬承禎八

分書 聖歷二年二月

今在嵩山老君洞南題云弟子中巖道士獄馬嚙奉
書按唐書隱逸傳司馬承禎字子微事潘師正傳辟
穀導引術無不通師正異之曰我得陶隱居正一法
逮而四世矣則此碑稱弟子者司馬承禎也廣韻獄
亦司字老君洞即唐之逍遙谷潘師正傳云居逍遙

谷高宗詔即其廬作崇唐觀及營奉天宮又勅直道遙谷作門曰仙游北曰尋真

昇仙太子碑 行書 聖歷二年六月

今在偃師縣南三十五里府店

緱氏山
本廟

明堂令于大猷碑 正書 聖歷三年十一月

今在三原縣

碑云聖歷三年歲次庚子十一月十二日合葬於雍州三原縣萬壽鄉之先塋而碑非此時立也蓋後續

為之故其書竝不用武后所製字

陪勅使麻先生祭岳詩 守博城縣令馬□□

在岱岳觀碑東側面其文剝蝕不全久視二年記所
稱神都青元觀主麻慈力即其人也武后遣之至觀
修醮神都即東都故有伊水嵩巖之句

心經 正書 大足元年僧有晦建

今在京師

御製夏日游石淙詩并序 薛曜正書 久視元年五

月

今在嵩山石淙北崖上其詩天后自製七言一首侍
遊應制皇太子惠顯太子左奉裕率兼檢校安北大
都護相王惠旦太子賓客上柱國梁王惠三思內史
惠狄仁傑奉宸令惠張易之麟臺監中山縣開國男
惠張昌宗鸞臺侍郎惠李嶠鳳閣侍郎惠蘇味道夏
官侍郎惠姚元崇給事中惠閻朝隱鳳閣舍人惠崔
融奉宸大夫汾陰縣開國男惠薛曜守給事中惠徐

彥伯右玉鈐衛郎將左奉宸內供奉惡楊敬述司封
員外惡于季子通事舍人惡沈佺期各七言一首

文內天台訛右銜訛衝瀑水訛曝

順陵碑 正書 長安二年正月

拓本

首曰大周無上孝明高皇后碑銘并序特進太子賓
客監修國史上柱國梁王惡三思奉勅撰太子左奉
裕率兼檢校安北大都護相王惡旦奉勅書此武后

追尊其母楊氏之碑其時睿宗為相王奉勅書之字
體與景龍觀鐘銘同內虎字再見末筆俱不全箴字
號字亦同猶未斥唐諱又君字作爾亦他碑所未見
疑古文君字亦類此仁山金氏謂商書太甲上篇自
周有終相亦惟終當為自君古文君字似周故誤作
周

唐君臣正論武后改易新字以山水土為地千千万
萬為年永主久王為證

蕭元春佛像贊證字作鑒

長正主為聖一

忠為臣一生為人一人大吉為君

按舊唐書蘇頲傳玄宗欲於靖陵建碑頲諫曰自古
帝王及后無神道碑若靖陵特建則祖宗之陵皆須
追造玄宗乃止韋湊傳語亦同靖陵者玄祖母昭成
后竇氏之葬也然則唐之高祖太宗皆無碑矣順陵
之有碑蓋武后初為之而乾陵之有碑則中宗踵為
之乎

高延貴造佛像贊 正書 長安三年七月

韋均造佛像贊 正書 長安三年九月

蕭元春造佛像贊 行書 長安三年九月

李承嗣造佛像銘 正書 長安三年九月

姚元景光宅寺造佛像銘 正書 長安四年九月

今竝在西安府南門內華塔寺

衛州共城縣百門陂碑 辛怡諫文 張元琮記 孫

去煩行書 長安四年

今在輝縣

秋日宴石淙序 張易之撰 正書 闕年月

今在嵩山石淙南崖

上騎都尉相里瑞碑 正書

今在汾陽縣小相里之北太師墓上太師者五代時
相里金也二碑竝列此碑漫滅特甚其可識者曰上
騎都尉相里府君之碑曰相里瑞字鳳威曰夫人任
氏而中有而塋②字知其為武后時立也

岱嶽觀造像記 神龍元年三月 景龍二年二月

三年三月各一首

□部將軍功德記 郭□□撰 八分書 景龍元年

十月

今在太原縣天龍寺後將軍名珣其氏曰□部而部
上闕一字官至天兵中軍副使右金吾衛將軍上柱
國開國公與其夫人黑齒氏造像之記其文曰本支
京海世食舊德相虞不臘之奇族行太上懷邦由余
載格蓋蕃將之歸唐者也

比丘尼法琬碑 僧承遠撰 劉欽旦正書 景龍三

年五月

今在西安府城外賈里村

許公蘇瓌碑 盧藏用序并八分書 張說銘 景雲

元年十一月

今在武功縣漫漶

長安縣丞蕭思亮墓誌銘 顏惟貞撰 正書 景雲

二年二月

近出西安府城南神和原土中

幽州石浮屠銘 甯思道書 景雲二年四月

拓本

賜道士楊太希勅 景雲二年六月

在岱岳觀東碑南面

景龍觀鐘銘 睿宗御書 景雲二年九月

今在西安府鐘樓上

初唐人作字尚有八分遺意正書之中往往雜出篆

體無論歐虞諸子即睿宗書亦如此猶之初唐律詩
稍似古風平仄不盡穩順開元以後書法日盛而古
意遂亡遂以篆楷為必不相通分為兩部然而蚩之
从虫𠂔之从巳黎之从勿薛之从自虛之从𠂔鼎之
从析出益之从横𠂔此皆見行於今代者而不察其
為篆也詩篇書法日以圓熟而俗筆生焉亦世道升
降之一端矣

馮本殘碑 □ 朝隱撰 八分書 先天元年十一月

今在高陵縣西南七里府君廟

涼國公契苾明碑 婁師德撰 殷玄祚正書 先天

元年十二月

今在咸陽縣

此碑立於先天元年十二月乃玄宗受禪之後而碑
猶用武后字又明父何力史作何而此碑作河又其
中特勤字再見皆特勒之訛按北史突厥傳大官有
葉護次特勒唐書突厥傳可汗者猶古之單于其子

弟謂之特勒

通典同溫公通鑑考異曰諸書或作勒勒今從新舊二唐書

迴紇傳

依託高車臣屬特厥近謂之特勒無君長契苾何力
傳父葛隋大業中繼為莫賀咄特勒隋書高祖紀突
厥雍虞閭可汗遣其特勒來朝李崇傳突厥遣使謂
崇曰若來降者封為特勒史傳中稱特勒者甚多此
乃作特勤又柳公權神策軍碑亦云大特勤嗚沒斯
此皆書者之誤若其中有云玉質金相作箱鷹揚字
前从木後从才又其小失也

誌公碑 行書 開元三年二月

其額云大唐齊州章丘縣常白山醴泉寺誌公之碑
今仍在寺中而其地已割入鄒平矣碑陰有誌公像
其下方斷齧不全

按此所述是梁之寶誌與陸倕文略同而曰既墓彼
山又墳茲嶺則此地亦有誌公墳也按雒陽伽藍記
別有一寶公豈即其人而作文者誤以為梁之寶誌
乎不然何以一人而兩葬也

按僧家有衣鉢爪
髮塔不嫌兩葬

灋藏禪師塔銘 田休光撰 正書 開元四年五月

今在西安府南山

贈歙州刺史葉慧明碑 江夏李□□ 國子□太學

生□□□八分書 開元五年七月

今在金鄉縣此為葉法善之父本傳法善括州括蒼
人三世為道士皆有攝養占卜之術高宗聞法善名
徵詣京師法善自高宗則天中宗殆五十年嘗往來
名山數詔入禁中盡禮問道然排擠佛法議者或譏

其向背以其術高終莫之測也睿宗即位稱法善有
冥助之功先天二年拜鴻臚卿封越國公仍舊稱為
道士止於京師之景龍觀又贈其父為歙州刺史年
一百七歲卒

其叙葉氏云聃季食沈子高封葉則葉字當音式涉
反今人讀為枝葉之葉者非也

又其文有曰情隋地深字當作隨而省為隋

兗州都督于知微碑 姚崇撰 正書 開元七年六

月

今在三原縣漫漶

修孔子廟碑 李邕撰 張廷珪八分書 開元七年

十月

今在曲阜縣廟中

舊唐書張廷珪傳廷珪素與陳州刺史李邕親善屢
上表薦之邕所撰碑碣之文必請廷珪八分書之廷
珪既善楷隸甚為時人所重庭字作廷邕傳同

雲麾將軍李思訓碑 李邕撰并書 行書 開元八

年六月

今在蒲城縣

華嶽精享昭應之碑 八分書 開元八年

今在華陰縣西嶽廟中其文即刻於後周天和二年

頌碑之陰宣義郎行華州華陰縣主簿咸廩撰殿中

侍御史劉升書銀青光祿大夫檢校華州刺史上柱

國李光休題額碑之右旁有顏魯公大字題名乾元

元年十月左旁有賈竦謁華嶽廟詩元和元年十月
作并書太和六年四月姪男宣義郎行華州叅軍琬
重修碑之下方亦有唐人題名此碑前後空處為宋
人攙入題名甚多幸正文皆八分書題名或隸或行
不相混耳廟中古碑嘉靖末地震多毀唐碑惟此與
述聖頌二通僅存

古碑陰多無刻字故後周之碑而唐人得以刻之觀
此一碑而周人之質樸唐人之謙約兩見之矣按此

為華陰縣主簿咸廩而新唐書趙冬曦傳有大理評事咸廩業亦開元時人恐即是一人

北嶽府君碑 韋虛心撰 陳懷志行書 開元九年

三月

今在曲陽縣北嶽廟中

鎮軍大將軍吳文墓銘 興福寺僧大雅集王右軍書

開元九年十月

此碑萬厯末浚西安府城濠得之今置儒學中俗謂

之半截碑

其文有曰夫人李氏圓姿替月潤臉呈花唐人寫狀
婦容云爾猶有碩人詩意今人以為嫌不肯作此語
矣

雲居寺石浮圖銘 梁高望書 開元十年四月
今在房山縣

秦望山法華寺碑 李邕撰并書 開元十一年二月
今重刻在紹興府秦望山

御史臺精舍碑 崔湜撰 梁昇卿八分書 開元十

一年

今在西安府儒學

碑陰題名表其上格曰侍御史并內供奉列盧懷慎等名中格曰殿中侍御史并內供奉列崔湜等名下格曰監察御史下有一并字下缺不全列陸景初等名其盧崔陸三人姓名竝八分書蓋梁筆也餘則正書乃後人續書之者 碑額空處前後皆有刻前刻

監察御史及姓名後刻知雜侍御史及姓名有自天
寶元載以後七字按天寶三年始改年為載不當云
元載恐是追書

宋趙彥衛雲麓漫鈔曰唐有三院御史侍御史謂之
臺院殿中侍御史謂之殿院監察御史謂之監院

讀此文知唐時御史臺有獄又於其旁立精舍援引
釋典以勸人回心作善然考之舊唐書開元十四年
崔隱甫為御史大夫在職強正無所迴避自貞觀年

李乾祐為御史大夫別置臺獄有所鞫訊便輒繫之
由是自中丞侍御史以下各自禁人牢扉常滿隱甫
引故事奏以為不便遂掘去之則其獄未幾而廢又
言溫造為御史中丞太和二年十一月宮中昭德寺
火宰臣兩省京兆尹中尉樞密皆環立於日華門外
令神策兵士救之唯臺官不到造奏以臺有繫囚恐
緣為姦追集人吏隄防所以至朝堂在後則又不知
何時而復置也

新書隱甫傳云其後患囚往來或漏泄復繫之

宋時亦

有臺獄曾肇記云始自開寶五年

池州刺史馮公碑 崔尚撰 郭謙光八分書 開元

十一年

今在咸陽縣其文曰公諱仁□字□玄長樂人馮文
王之胄也仁下闕一字

娑羅樹碑 李邕撰并書 行書 開元十一年

今重刻在淮安府

張弼曰其末曰一歸可門可門者何門也考說文誰

何之何本單作可其从人者則為詹何之何易何校
減耳詩何蓑何笠爾雅何鼓謂之牽牛是也後借為
誰何之何更以擔荷為詹何字字日繁而忘其本矣
此文以可為何可見開元時文字尚存古法

石佛堂記 孫義龍撰并書 行草 開元十二年三
月

今在臨城縣李莊漫漶

淨業法師塔銘 畢彥雄撰 正書 開元十二年六

月

今在西安府城南香積寺

涼國長公主碑

蘇頲撰

玄宗八分書

開元十二

年十一月

今在蒲城縣

其文有云開元十二載八月辛丑薨于京永嘉里第

按唐書天寶三年正月丙辰朔改年為載而此在其前二十年已云載矣蓋文字中偶一用之後乃施之

詔令符牒耳

楊將軍新莊像銘 正書 開元十年

今在西安府南門內華塔寺

右武衛大將軍乙速孤行儼碑 劉憲撰 白義晳八

分書 開元十三年二月

今在醴泉縣叱干村漫漶

古義士伯夷叔齊二公碑 梁昇卿撰并書 八分書

開元十三年

今在蒲州首陽山二賢廟中其文書于碑之兩面其側有後唐同光元年護國軍節度押衙丁約建立廟宇題字

述聖頌 正書 開元十三年

今在華陰縣嶽廟之東道院京兆府富平縣尉達奚珣撰序左補闕集賢殿直學士呂向撰頌并書其陰之上方有韓賞告嶽神文韓擇木八分書下方有大歷九年華陰令盧朝徹謁嶽廟文有貞元九年十三

年題名左旁有乾元二年張惟一祈雨記右旁有上
元元年華陰縣令王宥等題名李樞書上為篆下為
八分

紀泰山銘 玄宗御製并書 八分書 開元十四年
今在泰山頂石崖上

東封朝覲頌 蘇頲撰 開元十四年

在紀泰山銘右石崖上近有閩人林煇開府山東以
忠孝廉節四大字鐫於其上頌文毀去其十三四觀

者笑之

恒山祠碑

張嘉貞撰并書 行書 開元十五年八

月

今在曲陽縣北嶽廟中舊唐書本傳嘉貞為定州刺史至州於恒嶽廟中立頌自為文書於石其碑用白石為之素質黑文甚為奇麗先是嶽祠為遠近祈賽有錢數百萬嘉貞自以為頌文之功納其數萬今白石碑尚在本傳又言嘉貞官至宰相不為子孫立業

豈好貨者乎或矜夸其文則有之然唐人以文取錢未嘗以官取錢嘉貞於此又僅百而取一古之疾也今也或是之亡矣

道安禪師碑 宋儋撰并書 行書 開元十五年十月

今在嵩山會善寺廢戒壇前中斷

少林寺碑 裴淮撰并書 行書 開元十六年七月
今在大殿東南鐘樓下

葉封曰文稱有御書碑額七字當是明皇書今亡之
而上有橫刻開元神武皇帝書七字似屬後人所為
碑陰有少林寺賜田牒

碑內王字俱鐫去按金史海陵正隆二年二月癸卯
改定親王以下封爵等第命置局追取存亡告身公
私文書但有王爵字者皆立限毀抹雖墳墓碑誌並
發而毀之則知前代封爵之碑有王字者多毀仆於
此時而此碑以梵力獨存乃其間王宮夏王王言育

王等字亦從而鐫去矣完顏之不通文義而肆為無道可勝歎哉

唐碑遇帝號必空三字此碑所紀宇文周事有明皇帝皇上空三字有隋高祖祖上空三字而前有周武帝却不空蓋緇流不通古今者之所為也

敬節法師塔銘 正書 開元十七年七月

今在西安府城外杜永村

龍角山慶唐觀紀聖銘 玄宗御製并書 八分書

開元十七年九月

今在浮山縣龍角山

舊唐書地理志武德二年分襄陵置浮山縣四年改為神山冊府元龜載開元十四年九月制曰玄元皇帝先聖宗師國家本系昔草昧之始告受命之期高祖應之遂於神降之所置廟改縣曰神山近日廟庭屢彰嘉瑞虔荷靈應祇慶載深宜令本州擇精誠道士七人於羊角廟中潔齋焚香以崇奉敬

比丘尼法澄塔銘

□志□撰并書

行書 開元十

七年十一月

今在西安府城外東南馬頭空

嶽麓寺碑

李邕撰并書

行書

開元十八年九月

今在寺中殘缺

廬山東林寺碑

李邕撰并書

行書

開元十九年

七月

今在寺中元延祐七年寺火碑壞後至元三年僧慶

哲重摹刻石

元氏令龐履溫碑 邵混之撰 蔡有鄰八分書 開
元二十四年二月

今在元氏縣西寺內

碑陰有宋熙寧九年孟士龍遷碑記 滎陽鄭陶撰
大智禪師碑 嚴挺之撰 史惟則八分書并篆額
開元二十四年九月

今在西安府儒學

碑陰記陽伯成撰史惟則八分書開元二十九年五月其上方有宋金人題名

進法師塔銘 陳光撰 僧智詳正書 開元二十五年七月

今在西安府實際寺剝蝕

檀法師塔銘 姜立祐撰 正書 開元二十五年八月

今在西安府西門外崇仁寺銘文正書而後列弟子

沙門名皆八分書

景賢大師身塔石記 羊俞撰 沙門溫古行書 開

元二十五年八月

今在嵩山會善寺

葉封曰按王維有留別溫古上人兄詩云宗兄此削髮蓋其族人亦必可稱者也

周尉遲迥廟碑 顏真卿撰 蔡有鄰八分書 開元二十六年正月

今在彰德府剝蝕過半

任城縣橋亭記 游芳撰 王子言八分書 開元二

十六年閏八月

今在濟寧州儒學泮池上

鐵像頌 王端撰 蘇靈芝行書 開元二十七年五

月

今在易州

山頂石浮屠後記 王守泰行書 開元二十八年四

月

今在房山縣記金仙公主奏賜譯經四千餘卷并范陽縣東南五十里上城村趙襄子淀中麥田莊并果園一所及環山林麓

石壁寺鐵彌勒像頌 林諤撰 房嶠妻高氏行書
開元二十九年六月

今在交城縣石壁山寺末有金泰和四年跋

夢真容碑 蘇靈芝行書 開元二十九年六月


今在鰲屋縣樓觀

是年四月玄宗自言夢見玄元皇帝云有像在京城西南百餘里即命使同諸道士求得之於鰲屋縣樓觀東南山阜間迎至興慶宮大同殿宰相牛仙客李林甫拜賀

金仙長公主碑 徐嶠之撰 明皇行書 開元中
今在蒲城縣

鄔國長公主碑 張說撰 明皇八分書

今在蒲城縣



金石文字記卷三

欽定四庫全書

史部
金石文字記卷四

詳校官編修臣潘廷筠

編修臣程嘉謨覆勘

總校官知縣臣繆琪

校對官主事臣陳文樞

謄錄監生臣張泰

欽定四庫全書

金石文字記卷四

崑山顧炎武撰

唐

雲麾將軍李秀碑 李邕撰并書 行書 天寶元年

正月

孫承澤春明夢餘錄曰李秀字玄秀范陽人以功拜
雲麾將軍左豹韜衛翊府中郎將封遼西郡開國公

開元四年卒葬范陽之福祿鄉此碑為靈昌郡太守
李邕文并書逸人太原郭卓然模勒并題額李北海
有兩雲麾碑一為李思訓碑在蒲城一為此碑其官
同其姓同也趙子名秦人未見此碑其著石墨鐫
華乃以為一碑又以此碑為趙子昂所臨誤矣碑不
知何時入都城萬厯初宛平令李蔭署中掘地得六
礎洗視乃此碑存者百八十餘字碑首存唐故雲三
字因築室砌之壁間名曰古墨齋後移少京兆署中

止二礎其四礎相傳萬厯末王京兆惟儉攜之大梁

道振禪師塔銘

正書

天寶元年正月

今在

闕

褒封四子勅

正書

天寶元年二月

今在盤屋縣樓觀

舊唐書禮儀志天寶元年正月癸丑陳王府參軍田

同秀稱於京永昌街空中見玄元皇帝以天下太平

聖壽無疆之言傳於玄宗仍云桃林縣故關令尹喜

宅旁有靈寶符發使求之十七日獻於含元殿二月
丁亥御含元殿加尊號為開元天寶聖文神武皇帝
辛卯親祔玄元廟丙申詔史記古今人表玄元皇帝
昇入上聖莊子號南華真人文子號通玄真人列子
號冲虛真人庚桑子號洞虛真人改莊子為南華真
經文子為通玄真經列子為冲虛真經庚桑子為洞
虛真經今人稱莊子書為南華經昉於此也李肇國
史補曰天寶中天下屢言聖祖見因以四子列學官

故有偽為庚桑子者其辭鄙俚非古人書

充公之頌

張之宏撰

包文該正書

天寶元年四

月

今在曲阜縣孔子廟中

舊唐書禮儀志開元二十七年八月制追謚孔子為
文宣王贈顏子淵充公閔子騫費侯冉伯牛鄆侯冉
仲弓薛侯冉子有徐侯仲子路衛侯宰子我齊侯端
木子貢黎侯言子游吳侯卜子夏魏侯又贈曾參顓

孫師等六十七人皆為伯

告華嶽文 八分書

在述聖頌碑陰之上方

首云惟廿七祀孟秋右補闕韓賞敢昭告于泰華府
君祠廟其末云天寶元年歲次壬午四月乙亥朔十
日甲申諸王侍書榮王府司馬韓擇木書

玄宗御書裴忠獻公墓碑

玄宗賜張說勅

今竝在聞喜縣東門外裴趙二公祠前一碑兩面

心經 陳令望書 天寶元年四月

拓本

玄元靈應頌 戴琰撰序 劉同昇撰頌 戴伋八分

書 天寶元年七月

今在藍屋縣樓觀

趙崑曰此頌刻於宗聖觀記之北面唐人分書甚佳
但經元人翻本減弱矣碑側宋蘇軾書詩并弟轍詩

歲久剝蝕元人別摹一碑視碑側字法亦減

慶唐觀金錄齋頌 崔明允撰 史惟則八分書 天

寶二年十月

今在浮山縣龍角山

昔人所用莊子御六氣之辨意各不同惟梁簡文帝
南郊頌玄默御辨寂照秉真後周庾信至老子廟詩
虛無推御辨寥廓本乘蜺及此碑云皇帝御辨無為
齋心正一為得其旨若齊謝朓侍宴曲水詩於皇克

聖時乘御辨梁敬帝禪位策文安國字萌本因萬物
之志時乘御辨良會樂推之心後周庾信喜晴詩御
辨誠膺錄維皇稱有建宋王旦汾陰壇頌欽明稽古
御辨撫圖則以為首出在位之義梁王僧辨勸進元
帝表坦然大定御辨東歸隋李德林從駕詩朝乘六
氣辨夕動七星旒則以為巡遊之事唐朱子奢幽州
昭仁寺碑御辨崆峒非趨涅槃之所乘雲谷口寧遊
波若之門碧落碑峒山順風勞乎靡索汾陽御辨宵

然自喪武后昇仙太子碑尋真御辨控鶴乘龍則以
為訪道之事隋薛道衡高祖文皇帝頌御辨遐逝乘
雲上仙則又借為升遐之事而唐李嶠大周降禪碑
翠鳳銜蕤黃龍御辨則又不知其何所出也

隆闡法師碑 天寶二年十二月

今在西安府儒學題曰唐實際寺故寺主懷憚奉勅
贈隆闡大法師碑銘并序其下曰懷憚及書蓋不可
曉

文中有弟子大溫寺主思莊敬想清徽勒茲玄琰疑
即其所書

嵩陽觀聖德感應頌 李林甫撰 徐浩八分書 裴
迴題額 天寶三載二月

今在登封縣嵩陽宮遺址

騎都尉薛良佐塔銘 再從兄鈞撰 弟良史正書
天寶三載閏四月

今在闕

文言年止廿八卒于里第塔於終南山施陀林善知識之次此官而葬以僧者

孝經 玄宗御製序并注及書 八分書

今在西安府儒學

前第二行題曰御製序并注及書其下小字曰皇太子臣亨奉勅題額其額曰大唐開元天寶聖文神武皇帝注孝經臺後有天寶四載九月一日銀青光祿大夫國子祭酒上柱國臣李齊古上表及玄宗御批

大字草書三十八字其下有特進行尚書左僕射兼

右相吏部尚書集賢院學士修國史上柱國晉國公

臣林甫光祿大夫行左相兼兵部尚書弘文館學士

上柱國渭源縣開國公臣李適之等四十五人姓名

惟林甫以左僕射不書姓

舊唐書王璠傳載李絳疏云左右僕射師長庶僚開

元中名之宰相表狀之中不署其姓宋周必大二老堂雜志曰祖宗朝宰相官至僕射勅後乃不著姓他相階官自吏部尚書而下皆著姓

中間人名下攬入丁酉歲八月廿

六日紀九字是後人所添是歲乙酉非丁酉也又未

二人官銜下不書臣亦可疑

孝經疏序曰孝經河間顏芝所藏因始傳之於世自西漢及魏歷晉宋齊梁注解之者殆及百家至有唐之初雖備存祕府而簡編多有殘缺傳行者惟孔安國鄭康成兩家之注并有梁博士皇侃義疏播於國序然辭多紕繆理昧精研至唐玄宗朝乃詔羣儒學官俾其集議是以劉子玄辨鄭注有十謬七惑司馬堅斥孔注多鄙俚不經其餘諸家注解皆榮華其言

妄生穿鑿明皇遂於先儒注中採摭菁英去煩亂
撮其義理允當者用為注解至天寶二年注成頒行
天下仍自八分御札勒於石碑即今京兆石臺孝經
是也

竇居士神道碑 李邕撰 段清雲行書 天寶六載
今在咸陽縣

封安天王之銘 李荃撰 戴千齡八分書 天寶七
載

今在曲陽縣北嶽廟中碑陰文康傑撰戴千齡八分書

康傑文內有皇族從叔朝請郎行司兵叅軍欽回不書姓而冠以皇族夫國君之尊族人不得以屬通而况天子乎

崇仁寺院羅尼石幢 張少悌行書 天寶七載五月
今在西安府尊勝陀羅尼石幢天下多有不具載此
以少悌之名而存之

少林寺靈運禪師塔銘 崔琪撰 沙門勤闕行書

天寶九載四月

今在寺中碑頂有字云寺西石塔靈運師墳即梁帝
皇嗣者也以其為梁武帝之裔而稱皇嗣亦為不順
其陰刻陀羅尼經咒

清河郡太夫人張氏墓誌銘 索玄愛撰 男林有鑒
正書 天寶九載五月

今在咸陽縣

永泰寺碑 沙門靖彰撰 荀望行書 天寶十一載

閏三月

今在嵩山永泰寺

多寶佛塔感應篇 岑勛撰 顏真卿正書 徐浩題

額 天寶十一載四月

今在西安府儒學岑參集有登千福寺楚金禪師法

華院多寶塔詩

施燈功德經 正書 天寶十三載正月

今在西安府城南香積寺

東方朔畫像贊并碑陰 夏侯湛撰贊 顏真卿正書

天寶十三載十二月

今在陵縣署後堂

憫忠寺寶塔頌 張不矜撰 蘇靈芝行書 至德二

載十一月

今在京師憫忠寺

宋文惟簡北庭事實曰燕京城東壁有大寺一區名

曰憫忠唐太宗征高麗回念忠臣義士沒於王事者
建此寺為之薦福東西有兩磚塔高可十丈是安祿
山史思明所建此碑稱御史大夫史思明奉為大唐
光天大聖文武孝感皇帝敬无垢淨光寶塔頌者是
也春明夢餘錄曰此碑蓋建於思明初歸附之時其
碑完好近日劉同人名侗作帝京景物畧謂碑上半斷
裂不可讀且蘇靈芝書名甚著當時乃謂為李北海
自鐫名尤誤之甚不知北海自鐫名乃伏靈芝也此

碑書丹于石故以左為前

按舊唐書肅宗紀至德二載十二月己丑賊將偽范陽節度使史思明以其兵衆八萬與偽河東節度使高秀巖並表送降三載正月戊寅上皇御宣政殿冊皇帝尊號曰光天文武大聖孝感皇帝二月丁未大赦天下改至德三載為乾元元年今此碑建於二載十一月而已稱尊號又以大聖字移在文武之上與史書不合

宣和書譜蘓靈芝儒生也嘗為易州刺史郭明肅書
候臺記靈芝行書有二王法而成就頗放當與徐浩
鴈行戈脚復類世南體亦善於臨倣者

予後至燕一日與鄆人萬言同至憫忠寺諦觀此碑
萬曰前行大唐光天大聖文武孝感皇帝及中間唐
字史思明字類磨去重刻者石皆凹而首行憫忠寺
上元只二字今改范陽郡三字蓋思明復叛之後磨
去之及思明誅後此地歸唐後人重刻者也當日君

臣之分殆如奕基然非親至其下摩挲遺石而徒搨紙上之字未有能得其情者若年月尊號之先後亦從此而無疑矣

華嶽題名 顏真卿大字正書 乾元元年十月

今在華嶽碑之右旁王伯厚言華嶽題名五百十一人再題三十一人自開元訖清泰今存者惟此與述聖頌二碑不過二十餘人而已又因地震之後以碎石裝砌嶽廟大門牆上亦有唐人題名今王無異所

搨得者通共九十二人有裴士淹李德裕李商隱名
祈雨紀 張惟一撰 李權八分書 乾元二年二月
今在述聖頌碑之左旁

大德禪師遷葬記 沙門義宣撰 行書 乾元二年
二月

今在西安府華嚴寺

乞御書題天下放生池碑額表并御書批荅 顏真卿

正書 上元元年七月

拓本有碑陰記一通書大厯九年甲子日

贈工部尚書臧懷恪碑 顏真卿撰并書 正書

今在三原縣九陂城臧氏墓上碑文有廣德元年十月字碑文厯敘臧氏自魯公子彊及僖哀二伯文武兩仲而其下又列丈人子原義和榮緒按莊子文王寓而政于臧丈人下距魯隱公殆四百年不得以為公子彊之後且莊子中名氏多是寓言不可為據

莊子

文王觀於臧見一丈夫釣李軌云臧地名也

子原乃漢臧洪原字从厂从

泉後人復添三點今後漢書作子源

臨淮王李光弼碑

顏真卿撰

張少悌行書

廣德

二年十一月

今在富平縣儒學

左金吾衛將軍臧希晏碑

韓秀弼八分書

廣德二

年八月

今在三原縣

心經 趙偃正書

廣德二年八月

今在京師城內西南隅石鐙菴

郭敬之家廟碑并陰 顏真卿撰并書 正書 廣德

二年十一月

今在陝西布政司署中

李寶臣記功載政頌 王佑撰 王士則行書并篆額

永泰二年七月

今在真定府察院內

頌曰嶠嶠我公為君武臣以嶠為嶠

嵩山會善寺戒壇勅牒 行書 大厯二年十一月

今在嵩山會善寺西上層刻中書奉勅牒中層刻沙
門乘如謝表下層刻代宗御書批答二十四字

碑文准字本當作準宋周必大二老堂雜志曰勅牒

準字去十為准或謂本朝因寇準為相而改胡三省通鑑注

亦云本朝寇準為相省吏避其名凡文書準字皆去十後遂因而不改又云曾公亮蔡

京父皆名準而避其實不然予見唐告已作准又考
五代堂判亦然頃在密院令吏用準字既而作相又

令三省如此寫至今遂定今據大厯時牒已用准字
則知此字自取省筆果若益公之言而改為準字則
未見後人之遵用也廣韻二字竝收准字下注曰俗
然管子書準字皆作准莊子平中准文子放准循繩
淮南子眇者使之准王褒洞簫賦夔襄准法皆用此
字緯書有洛書靈准聽京房造准形如瑟十三弦郭
忠恕佩觿集曰字林用准為平準之準

字林呂忱作

而後

魏仇儒為趙準造妖言曰燕當傾趙當續欲知其名

淮水不足

北史長孫肥傳

則淮字之來久矣又按宋順帝名

準故沈約宋書平準令王準之皆作淮然管莊諸書

亦豈因此而改乎

先瑩記

李季卿撰

李陽冰篆書

大歷二年

三墳記

李季卿撰

李陽冰篆書

大歷二年

今竝在西安府儒學

元吾丘衍謂陽冰即杜甫之甥名潮取海賦陽冰不治之義為字既以字行乃別字少溫楊用修嘗辨其

非按陽水趙郡人太白從叔其字少溫見於宣和書譜與其名相應若名潮而以陽水少溫為字於義

皆無取且陽水工篆書潮工八分觀趙氏金石錄載城隍神祠記忘歸臺銘孔子廟記先塋碑三墳記等為李陽水篆書而慧義寺彌勒像碑彭元曜墓誌為李潮書則其非一人明矣今人讀陽水

為陽凝非也按文苑英華有林滋陽水賦戴侗六書故曰說文欠凍也冰水堅也俗作凝孫氏魚陵切說文蓋以冰為凝按欠於隸楷不能獨成文故後人加水焉凝之从辶从水無義當從今文

大證禪師碑銘 王縉撰 徐浩正書 大厯四年

闕

月

今在嵩嶽寺

撫州南城縣麻姑仙壇記

顏真卿撰并書

小字正

書

按魯公立此碑元作大字今有拓本而石亡其小字者乃別本後人補刻非初碑也

大厯六

年四月

今在建昌府南城縣麻姑山萬厯初年重刻

大唐中興頌

元結撰

顏真卿大字正書

大厯六

年六月

今在祁陽縣石崖上

宋馬永卿曰中興頌云復復指期此兩字出漢書匡衡傳云所更或不可行而復復之注云下復扶目反又何武為九卿時奏言宜置三公官又與翟方進共奏罷刺史更置州牧後皆復復故注云依其舊也下復扶目反

美原田真人碑 大歷六年九月

今在富平縣美原鎮題曰美原縣永

關觀關

朝散

欽定四庫全書

卷四

大夫

闕

并州別駕上柱國蘭陵蕭森

闕

政撰并模

晉王右軍書相傳田真人拔宅上昇處也

陀羅尼經石幢銘

僧昔真撰

布衣康玠行書

大

歷六年十月

今在富平縣六井

容州都督元結墓碑

顏真卿撰并書

正書

大歷

闕

年十一月

今在魯山縣

廣平郡公宋璟碑并碑側記 顏真卿撰并書 正書

大歷七年九月

今在沙河縣西北八里墓上

宋州官吏八關齋會報德記 顏真卿撰并書 正書

大歷七年

今在歸德府南門亭內

刺史崔倬敘顏魯公石幢事曰會昌中有詔大除佛寺凡堂閣室宇關於佛祠者掊滅無遺分遣御史覆

視之州縣祇畏至于碑幢銘鏤贊述之類亦皆毀瘞

此州

闕

元寺先有太師魯國顏公以郡守僚吏州人

等為連帥田氏八關齋會鐫紀大幢亦鑿缺仆埋因訪其遺文於前刺史唐氏之家得其模本命工補刻
大中五年正月一日

八關齋會始於宋齊之間通鑑齊武帝永明元年上於華林園設八關齋胡三省注曰釋氏之戒一不殺生二不偷盜三不邪淫四不妄語五不飲酒食肉六

不著花鬘瓔珞香油塗身歌舞倡伎故往觀聽七不
得坐高廣大牀八不得過齋後喫食已上八戒故為
八關雜錄名義云八戒者俗衆所受一日一夜戒也
謂八戒一齋通為八關齋明以禁防為義也

文宣王廟新三門記 裴孝智撰 裴平八分書并篆
額 大歷八年十二月

今在曲阜縣廟中

干祿字書 顏元孫撰 顏真卿書 正書 大歷九

年正月

今在潼川州

序稱第十三姪男真卿書按顏氏家訓曰兄弟之子
北土多呼為姪案爾雅喪服經左傳姪名雖通男女

竝是對姑之稱晉世以來始呼叔姪

晉書王湛傳濟才氣抗邁於湛

畧無子姪之敬

書姪而又加男此唐人之俗稱也

柳宗元祭六伯母文

亦自稱姪男

戴侗六書故曰爾雅女子謂弟弟子曰姪喪服傳

曰姪丈夫婦人報又曰謂吾姑者吾謂之姪

賈公序疏曰姪

者對姑之稱若對世叔唯得言昆弟之子不得言姪也

春秋傳曰姪其從姑

潘岳

楊仲武誄姑姪繼隕正用此所謂通男女之稱

又曰齊靈公娶于魯曰顏懿

姬無子其姪駸聲姬生光又曰臧宣叔娶于鑄生賈

及為而死繼室以其姪生紇今人謂兄弟之丈夫子

亦曰姪非也古者兄弟之子皆曰子漢書疏廣與其

兄子受父子竝為師傳後漢書蔡邕與其叔父質得

罪上書自陳亦曰言事者欲陷臣父子晉書謝安傳

安與兄子玄父子皆著大勲世說江左殷太常父子亦謂殷融與其兄子浩

史記武安侯傳往來侍酒魏其跪起如子姪疑當時

未有稱姪者漢書作子姓

禮記喪大記注子姓謂衆子孫也列子秦穆公謂伯

樂曰子姓有可使求馬者乎史記外戚世家既驩合矣或不能成子姓

朱子語類姪字本非兄弟之子所當稱當稱從子為是自曾祖而下三代稱從子高祖四世而上稱族子

清源公王忠嗣碑 元載撰 王縉正書 大厯十年

四月

今在渭南縣

玄靖先生李君碑

顏真卿撰并書

正書

大厯十

二年五月

今在句容縣茅山

都穆金薤琳琅曰碑稱隱居先生以三洞真法傳升

玄先生升玄付體玄先生體玄付正一先生正一付

先生今考隱居先生者梁陶弘景升玄為王遠知體

玄為潘師正正一為司馬子微三人唐書有傳惟玄靖無之予嘗遊茅山至玉晨觀其前有雷平池池南為伏龍岡玄靖墓其上碑今在觀中四周皆刻文字道士以亭覆之

高力士殘碑 行書 大歷十二年五月
今在蒲城縣

梵網經心地戒品 高堅正書 大歷十三年正月
今在嵩山會善寺後一碑兩面

贈揚州都督段行琛碑 張增正書 李同系篆額

大歷十四年閏五月

今在汧陽縣

孔子廟殘碑 程浩撰 顏真卿正書

今在華州

此文載于唐文粹為扶風縣文宣王廟記大歷二年
駕部郎中程浩文而今西安府學有僧夢英書此一
記其文正同但去扶風古縣也以下半篇其跋云此

記刊石元在湖州臨安縣夢英愛而書之豈駕部先作此於扶風魯公又書之於湖州而去其半篇耶又考唐地里志臨安縣屬杭州不屬湖州得非夢英之誤耶今華州有此殘碑數十字其文同

顏魯公與郭僕射書 行草

今在西安府儒學世謂之爭坐位帖

宋沈括夢溪筆談曰都堂及寺觀百官會集坐次多出臨時唐以前故事皆不可考惟顏魯公與左僕射

定襄郡王郭英又書云宰相御史大夫兩省五品供奉官自為一行十二衛大將軍次之三師三公令僕少師保傅尚書左右丞侍郎自為一行九卿三監對之從古以來未嘗參錯此亦畧見當時故事

顏魯公與蔡明遠書 行草

拓本 二帖竝依金石錄附于大厯之末

顏氏家廟碑 顏真卿撰并書 正書 李陽冰篆額

建中元年七月

今在西安府儒學一碑兩面并兩旁為四幅

碑題曰唐故通議大夫行薛王友柱國贈秘書少監
國子祭酒太子少保顏君廟碑銘乃真卿之父也其
文曰君諱惟貞字叔堅及敘其先世則曰魏有盛盛
字叔臺青徐二州刺史關內侯始自魯居于琅邪臨
沂孝悌里生廣陵太守葛繹貞子諱欽字公若生汝
陰太守護軍襲葛繹子諱默字靜伯生晉侍中右光
祿大夫西平靖侯諱含字弘都隨元帝過江生侍中

光祿勳西平定侯諱髦字君道生州西曹騎都尉西
平侯諱琳字文和生宣城太守御史中丞諱靖之字
茂宗生巴陵太守度支校尉諱騰之字弘道生輔國
江夏王叅軍諱炳之字叔豹生齊持書御史兼中丞
諱見遠字見遠生梁鎮西記室叅軍諱協字子和生
北齊給事黃門侍郎待詔文林館平原太守隋東宮
學士諱之推字介生皇泰王記室諱思魯字孔歸君
之曾祖也率子弟奉迎義旗于長春宮拜儀同生勤

禮字敬君之祖也著作郎修國史夔府長史贈虢州

刺史生昭甫

本名顯甫

敬仲殆庶無恤少連務滋辟疆昭

甫字周卿君之父也高宗侍讀曹王屬贈華州刺史

生我伯父諱元孫泉君君生闕疑允南喬卿真長幼

輿真卿允臧自父以上竝直書其名而加諱字其他

伯叔羣從悉名之予讀張燕公集有唐贈并州刺史

先府君碑首曰府君諱隲字成隲范陽方城人也又

有周通道館學士張府君墓誌乃說之曾祖也首曰

君諱弋字嵩之范陽方城人也又曰君即太常卿隆
之曾孫徵君子犯之孫河東從事俊之子又有唐處
士張府君墓誌乃說之祖也曰曾祖徵君諱子犯祖
河東郡從事諱俊父通道館學士諱弋竝直書其名
而加諱字唐文粹載陳子昂我府君有周居士文林
郎陳公墓誌文曰公諱元敬字某五世祖太樂生高
祖方慶方慶生曾祖湯湯生祖通通生皇考辯又有
梓州射洪縣武東山陳居士墓銘序曰君諱嗣字弘

嗣太樂即君之高祖父也生曾祖方慶生祖湯生皇
考迴君即迴之第二子也竝直書其名惟父加一諱
字劉禹錫集有子劉子自傳曰曾祖凱官至博州刺
史祖鎰殿中丞侍御史父諱緒浙西鹽鐵副使贈吏
部尚書亦惟父加一諱字白居易集有故鞏縣令白
府君事狀曰高祖諱建曾祖諱士通祖諱志善父諱
溫公諱鎰即居易之祖又曰長子諱李庚襄州別駕
事具後狀其襄州別駕府君事狀曰公諱李庚字某

鞏縣府君之長子即居易之父李翱集有皇祖實錄
一篇其首曰公諱楚金蓋古人臨文不諱而子昂禹
錫自祖以上不加諱字又所謂不逮事王父母則不
諱者也今人自述先人行狀而使他人填諱非古也
文有云子泉弘都之德行子泉即顏淵也避唐高祖
諱

顏魯公奉使蔡州書 行書

今在同州其上有魯公畫像

書曰真卿奉命來此事期未竟止緣忠勤無有旋意然中心恨恨始終不改游于波濤宜得斯報千百年間察真卿心者見此一事知我是行亦足達於時命耳又曰人心無路見世事只天知下有題曰觀此筆蹟不顯歲月以事實考之蓋使李希烈時也希烈以建中元年陷汝州盧杞建議遣公奉使至正元宋諱貞故元年八月丙戌公不幸遇害困蹟賊庭者踰二年作刃加於頸而色不變度無還期誓不易節蓋書此以

自表云靖康元年七月壬申朝散郎祕閣修撰知同
州軍事唐重書

又有忠義堂帖宋人所刻此帖名為奉命帖又有移
蔡一帖曰貞元元年正月五日真卿自汝移蔡天也
天之昭明其可誣乎有唐之德則不朽耳十九日書
葉少蘊避暑錄話曰顏魯公真蹟宣和間存者猶有
數十本其最著者與郭英乂論坐位書在永興安師
丈家祭姪季明文病妻乞鹿脯帖在李觀察士衡家

乞米帖在天章閣待制王質家寒食帖在錢穆甫家

其餘與蔡明遠帖盧八倉曹帖送劉太真序等

當作劉太

沖不知在誰氏皆有石本坐位帖安氏初析居分為

二人多見其前段師文後乃併得之相繼皆入內府

世間無復遺矣

孫承澤曰送劉太沖序墨蹟舊在中書趙士禎家後歸之關中南宗伯宗

伯沒其邑中舉人東蔭商得之後復歸之南氏余從東君借臨月餘今國學所摹印即趙氏本也視墨蹟

文字及書法俱小異豈傳世不止一本乎

今忠義堂所刻已上諸帖皆有

之又有送辛冕序清遠道士同沈恭子遊虎丘寺詩

末題大歷五年十二月

又有開元二年二月顏元孫告身一通乾元元年四月顏昭甫告身一通寶應元年七月顏惟貞贈秘書少監告身一通殷氏贈蘭陵夫人告身一通大歷十二年八月顏真卿刑部尚書告身一通建中元年八月顏真卿太子太師告身一通後有宋至和二年蔡襄跋嘉定乙亥留元剛刻石

景教流行中國碑 僧景淨撰 呂秀巖正書 建中

二年太簇月

今在西安府城外金勝寺

不空和尚碑 嚴郢撰 徐浩正書 建中二年十一

月

今在西安府儒學

舊唐書王縉傳曰初代宗喜祠祀未甚重佛而元載
杜鴻漸與縉喜飯僧徒代宗嘗問以福業報應事載
等因而啟奏代宗由是奉之過當嘗令僧百餘人於

宮中陳設佛像經行念誦謂之內道場其飲膳之厚窮極珍異出入乘廐馬度支具廩給每西蕃入寇必令羣僧講誦仁王經以禳鹵寇苟幸其退則橫加錫賜胡僧不空官至卿監封國公通籍禁中勢移公卿爭權擅威日相凌奪凡京畿之豐田美利多歸於寺觀吏不能制僧徒雖有賊姦蓄亂敗戮相繼而代宗信心不易乃詔天下官吏不得簪曳僧尼又見縉等施財立寺窮極瓌麗每對揚啓沃必以業果為證以

為國家慶祚靈長皆福報所資業力已定雖小有患
難不足道也故祿山思明毒亂方熾而皆有子禍僕
固懷恩將亂而死西戎犯闕未擊而退此皆非人力
所能制也帝信之愈甚公卿大臣既推以業報則人
事棄而不修故大厯刑政日以陵遲有由然也五臺
山有金閣寺鑄銅為瓦塗金於上照耀山谷計錢巨
億萬緡為宰相給中書符牒令臺山僧數十人分行
郡縣聚徒講說以求貨利代宗七月望日於內道場

造孟蘭盆飾以金翠所費百萬又設高祖以下七聖
神座備幡節龍傘衣裳之制各書尊號於幡上以識
之昇出內陳於寺觀是日排儀仗百寮序立於光順
門以俟之幡花鼓舞迎呼道路歲以為常其傷教之
源始於縉也史傳所言佞佛之弊至切故具錄之按
此碑不空以一胡僧而官至特進大鴻臚開府儀同
三司肅國公遂為後代沙門授官之祖吁亦異矣
冊府元龜載不空贈官詔曰大道之行同合於異相

王者至理總歸於正法方化成之齊致何儒釋之殊
塗故前代帝王罔不崇信法教弘闡與時偕行特進
試鴻臚卿大興善寺三藏沙門大廣智不空我之祖
師人之舟楫超詣三學坐離於見聞修持萬行常示
於化滅執律捨縛護戒為儀繼明善教之志來受人
王之請朕在先朝早聞道要及當付囑常所歸依每
每執經內殿開法前席凭几同膠序之禮順風比崆
峒之問而妙音圓演密行內持待扣如流自涯皆悟

滌除昏妄調伏魔冤天人洗心於度門龍鬼受職於神印固以氣消災厲福致吉祥當有命秩用申優禮而得師為盛味道滋深思復強名載明前志夫妙界有莊嚴之士內品有果地之儀本乎尚德敬順時典可開府儀同三司仍封肅國公贈司空謚曰大辯正廣智不空三藏和尚

又言大歷三年二月興善寺不空三藏上言因修寺塔下見古堦得一小棺長尺餘發視有十餘重棺皆

金寶裝飾中有舍利骨及佛髮一條每棺一鎖規製
妙絕有殷仲文題贊其說近怪仲文為桓玄侍中領
左衛將軍安帝反正出為東陽太守未至關中不可
以欺里巷之儒而代宗乃出寶輿具威儀迎入內道
場奉之何哉

宋洪邁容齋三筆曰自唐代宗以胡僧不空為鴻臚
卿開府儀同三司其後習以為常至本朝尚爾元豐
三年詳定官制所言譯經僧官有授試光祿鴻臚卿

少卿者請自今試卿者改賜三藏大法師試少卿者
賜三藏法師詔試卿改賜六字法師少卿四字並冠
以譯經三藏久之復罷

吳嶽祠堂記 于公異撰 冷朝陽行書 興元元年
十月

今在隴州

按唐書是年五月二十八日副元帥李晟復京師七
月十三日德宗至自興元八月晟至鳳翔斬叛卒王

斌等及涇帥田希鑒此則以其年之十一月祭告吳山而掌書記于公異為此文也碑中所云相國涼公鎮鳳翔者李抱玉也

范陽郡新置文宣王廟碑 韋稔撰 張澹行書 貞元五年二月

今在涿州

李元諒懋功昭德頌 張濛撰 韓秀弼八分書 李

彛篆額 貞元五年十月

今在華州治大門內

舊唐書李元諒傳元諒本駱元光嘗在潼關領軍
積十數年軍士皆畏服德宗居奉天賊泚遣偽將何
望之輕騎襲華州刺史董晉奔州走望之遂據城將
聚兵以絕東道元諒自潼關將所部乘其未設備徑
攻望之遂拔華州望之走歸元諒乃修城隍器械召
募不數日得兵萬餘人軍益振以功加御史中丞賊
泚數遣兵來寇輒擊却之遷華州刺史兼御史大夫

潼關防禦鎮國軍節度使與副元帥李晟進收京邑
力戰壞苑垣而入遂復京師賜姓李改名元諒官終
隴右節度使

姜嫄公劉廟碑 高郢撰 張誼行書 貞元九年四
月

今在邠州城南唐邠寧節度觀察使張獻甫所遷謂
之新廟

聖母帖 僧懷素草書 貞元九年五月

今在西安府儒學

李抱真德政碑

董晉撰

班宏正書

貞元九年

今在潞安府

杜府君夫人韋氏墓誌銘

李宣撰

姪成均行書

貞元十年八月

今在西安府城外寺坡杜君官至京兆尹名濟

嵩山會善寺戒壇記

陸長源撰

陸郢八分書并篆

額 貞元十一年七月

在大厯勅牒碑之陰

同州澄城令鄭公德政碑

闕

撰 鄭雲達行書

貞元十四年正月

今在本縣文多剝泐但云公字叔敖鄭州滎陽人而不得其名

少林寺厨庫記 顧少連撰 崔漑正書 貞元十四

年

今在寺中

尚書李公造華嚴三會普光明殿功德碑 支高撰并

書貞元十六年四月

今在交城縣西北五里萬卦山天寧寺其文有云如
月之亘森菌桂以馨香如山之容寔大椿之壽筭是
用詩如月之恒恒字作亘音古鄧反按詩如月之恒
傳云恒弦也箋云月上弦而就盛陸德明釋文恒本
亦作絙同古鄧反沈音古恒反正義云月光至八日
九日月體正半昏而中似弓之張而弦直謂上弦也

考工記弓人恒角而短鄭司農云恒讀為聚絙之絙是絙恒亘同為一字而陸氏讀為去聲此文因用之

耳今廣韻絙字平去二聲齊收

楚辭九歌絙瑟兮交鼓一作絙招魂嫵容

修態絙洞房些一作絙李善西都賦注亘與絙古字通韓文公送侯叅謀詩信知後會時日月屢環絙

古人頌君之辭其言月不以望而以弦猶之言日不以中而以升日中則昃月望則虧故古人之取義不於其已盛而於其將盛此大易所以貴乎月幾望也今人讀為恒久之恒失之矣

生民詩恒之桓桓釋文恒古鄧反本又作亘

其西又有一碑為汾州衆香寺沙門克誠撰大半剥落有太尉李公抱貞字

靳英希墓誌銘 張遇撰并書 行書 貞元十七年

二月

近出鄠縣錠子村土中

劍州長史李廣業碑 鄭雲逵撰 正書 貞元二十

年十一月

今在三原縣

鉅鹿時俟墓誌銘

劉通明撰

行書

貞元二十一

年四月

其文曰葵薊縣燕夏鄉海王村之南原近出之土中

字拙而率

楚金禪師碑

沙門飛錫撰

吳通微正書

附奉勅

追謚號記

貞元二十一年七月

在顏魯公多寶塔碑陰

送李愿歸盤谷序

韓愈撰

高從

闕

書

貞元年

今在濟源縣廨其末有記云貞元辛關歲建丑月朔

海高從

關

乃書者之名而石缺之也宋元祐八年

濟源縣令傅君俞重刻

懷素藏真律公二帖 草書

今在西安府學

賈竦謁華嶽廟詩 正書 元和元年十月

詩五字十八韻刻於後周天和二年華嶽碑之左旁

蜀丞相諸葛武侯祠堂碑 裴度撰 柳公綽正書

元和四年二月

今在成都府

文稱元和二年相國臨淮公鎮蜀者武元衡也裴公
時為節度掌書記

文有云誰謂阻深殷為強國誰謂蓬脆勵為勁兵此
用左思魏都賦稟質蓬脆語廣韻蓬七戈切脆也唐
書王伾傳形容蓬陋

晉周孝侯碑

今在宜興縣首曰晉故散騎常侍新平廣漢二郡太守尋除楚內史御史中丞使持節大都督塗中京下諸軍事平西將軍孝侯周府君之碑晉平原內史陸機撰右軍將軍王羲之書其末曰唐元和六年歲次辛卯十一月十五日承奉郎守義興縣令陳從諫重樹前試太常寺協律郎黃以下缺張燮編次陸士衡文集收入此篇謂其中多訛謬文理不接且孝侯戰沒而云舊疾增加奄捐館舍明是不讀史者偽作按

此碑本唐人之書故業字晉諱而直書不避其於唐諱則世字二見皆作世虎字二見一作虎一改作獸基作基豫作預而塗中亦當作涂中三國志吳主傳作棠邑涂塘以淹北道晉書宣帝紀王凌詐言吳人塞涂水武帝紀琅邪王佃出涂中海西公紀桓溫自山陽及會稽王昱會于涂中孝武紀遣征虜將軍謝石帥舟師屯涂中安帝紀譙王尚之衆潰逃于涂中字竝作涂唐人加卩為滁即今之滁州而碑作塗非

也

文選梁任昉奏彈曹景宗東閩無一戰之勞涂中罕千金之費李善本作塗中

士衡逸少

既不同時而晉以前碑亦未有署某人書者其文對偶平仄全是唐人可定其為偽作也書梁王彤作彤尤誤

王弘撰曰按史士衡兄弟以惠帝大安二年十月見殺於成都王穎又十四年元帝即晉王位始稱建武元年而碑云建武元年冬十一月甲子追贈平西將軍封清流亭侯謚曰孝禮也然則已死之士衡又烏

知十四年後之事而預為云云如此耶又處之戰死
在元康七年正月癸丑今碑云元康元年捐館亦誤
石壁寺甘露義壇碑 李逢吉撰 正書 元和八年

三月

今在交城縣石壁山寺碑陰有進甘露表云臣說言
臣所部太原府交城縣石壁山寺今月二十二日夜
甘露降於寺內戒壇西及寺外栢林上大枝小葉無
不周徧凝泣垂滴甘甜如蜜當寺臨壇大德僧慎微

與僧惠廣等一十五人咸共觀嘗覆問如狀云云貞
元十二年九月二十五日臣說者河東節度使北都
留守太原尹李說即普光明殿碑所謂尚書李公者
也此碑為元至順三年重刻

唐時以太原府為北都交城距府八十里故有戒壇
而安祿山反楊國忠遣侍御史崔衆至太原納錢度
僧尼道士旬日得百萬緡當日差徭之重剝度之嚴
皆可知矣

內侍李輔光墓誌

崔元畧撰

巨雅正書

元和十

年四月

今在高陵縣

文稱門吏晉州司法叅軍巨雅此輔光為河中監軍
所除唐時士人而出於內侍之門者蓋不少矣輔光
少選入內而有夫人輔氏子四人唐之宦官有權位
者則得娶婦史之所載高力士娶呂玄晤女李輔國
娶元擢女皆奉勅為之而楊復光至假子數十人又

後漢書劉瑜傳言常侍黃門亦廣妻娶周舉傳言豎
宦之人亦復虛以形勢威侮良家取女閉之至有白
首歿無配偶逆於天心單超傳言四侯轉橫多取良
人美女以為姬妾則固不始於唐時也

唐人曰二字同一書法惟曰字左角稍缺石經曰
字皆作曰此碑及玄奘塔銘亦然故陸氏釋文於九
經中遇二字可疑者即加音切宋以後始以方者為
曰長者為日而古意失矣

碑內宮掖作官踐阼作祚士君子作仕皆誤盧藏用
書蘓許公碑亦以踐阼作祚

南海神廣利王廟碑 韓愈撰 陳諫正書 元和十

五年十月

今在廣州府東南八十里海神廟中

太保李良臣碑 李宗閔撰 楊正正書 長慶二年

今在榆次縣

邠國公功德銘 楊承和撰并書 正書 陸邳篆額

長慶二年十二月

今在西安府儒學

都穆金薤琳琅曰邠國公者內侍梁守謙也考之唐
史宦者守謙無傳惟憲宗元和十五年書帝暴崩於
太極殿中尉梁守謙王守澄等共立太子殺吐突承
璀及澧王憚而韓文公平淮西碑亦載守謙在帝左
右嘗命之往撫蔡師夫守謙以一宦者而爵至上公
此可見憲宗之信任小人宜其晚節不終卒死宦者

之手然則予之錄此蓋將為天下後世之戒而非徒取其文字也

西平郡王李晟碑 裴度撰 柳公權正書 太和三

年四月

今在高陵縣

狀嵩高靈勝詩 尉遲汾撰 正書 太和三年六月

今在中嶽廟壁有宋熙寧丁巳王紳題字

題云府尹王侍郎准制拜嶽準字作准

佛頂尊勝陀羅尼經序 僧叡川撰 僧無可正書

太和六年四月

今在西安府百塔寺

義陽郡王苻璘碑 李宗閔撰 柳公權正書

今在富平縣儒學金石錄云題中書侍郎同平章事
李宗閔撰宗閔太和七年為此官

宋王楙野客叢書曰苻堅其先本姓蒲其祖以識文
改為苻苻融其先魯頃公孫仕秦為苻璽郎以苻為

氏故苻堅之姓從草苻融之姓從竹二姓固自不同而唐義陽郡王苻璘碑合從竹而書作苻而苻堅之苻又有書從竹者皆失於不契勘耳余考漢碑隸書率以竹為𣎵少有從竹者如苻節字皆然今前漢書苻瑞多從𣎵魏晉以下真書碑亦有書苻節為苻節者蓋古者皆通用故耳此又不可不知顏元孫干祿字書曰從草者為姓從竹者為印亦未之察也苻融之苻獨非姓乎

金石文字記卷四